

a'e; e haere tia 'tura hoi matou i Roma. 15 E ite a'era te mau taeae i reira ia matou, ua haere maira ratou i Apio Phoro, e te Tabereno Toru ra, farerei maira ia matou; ite a'era Paulo ia ratou, haamaitai atura i te Atua e itoitaita atura.

16 E tae atura matou i Roma, ua tuu atura te raatira hanere i te mau taata tapeahia ra i te tapena o te pupū faehāu ra, area Paulo ua tuu noa 'tura oia ia'na ia parahi noa oia ana'e ra i roto i te fare, e te hoē faehau ei tia ia'na. 17 E rui toru a'era, ua parau atura Paulo i te feia rarahi ati Iuda ra. E putuputu maira ratou ua parau atura oia ia ratou, E te mau taeae nei, i tuua-tapea-noa-hia vau i Ierusalemia i te rima o to Roma, aita rā a'u e hara i to tatou, e te peu a to tatou hui tūpuna ra. 18 E oti a'era vau i te haava-hua-hia, e tuuhia ra vau e ratou, no te mea aita roa a'u e hara e au ai ia'u te pohe. 19 Ia mārō mai rā te ati Iuda, ua parau atura vau e, ei ia Kaisara vau aita ra a'u hara ia pari atu vau i to'u fenua. 20 I parau atu ai au ia outou, ia ite au ia outou, e ia paraparau atu vau ia outou, no ta Iseraela e tiaturi nei hoi i tapeahia 'i au i teie nei auri fifi. 21 Ua parau maira ratou ia'na, Aita a matou leta i noaa no Iudea mai ia oe, aore roa hoi te mau taeae i tae mai i ō nei i parau ino mai ia oe. 22 Te hinaaro atu nei rā matou ia ite matou ia oe i to oe mana'o: i tena na pupū, ua faainohia ia e aita vahī toē, ua ite matou. 23 E ia

haapaehia e ratou te hoē mahana, ua haere maira ratou e rave rahi i to'na fare, ua haapii atura oia ia ratou, e faaite atura i te basileia o te Atua, e a'o atura ia ratou i te mau parau o Iesu i roto i te ture a Mose, e te mau propheta ra, mai te poipoi mai ā e ahiahi noa 'tura. 24 Ua faaroo maira te tahi pae i taua mau parau i parauhia ra, e aore te tahi pae i faaroo. 25 E aita a'era i au ta ratou iho parau, purara 'tura ratou ia oti a'e ia Paulo teie nei re'o hoē i te parauhia, E parau-tia ta te Varua Maitai ia Isaia propheta i to tatou hui tūpuna ra, 26 a na ō mai ai ra e, A haere atu i taua feia ra i parau atu ai e, E faaroo outou i te faarooora, e ore rā e ite, e hi'o outou i te hi'oraa, e ore rā e haroaroa. 27 Ua meumeu hoi te aau o taua feia ra, ua faaroo taiata to ratou tari'a, ua tapiri ratou i to ratou mata, o te hi'o to ratou mata, o te faaroo to ratou tari'a, o te ite to ratou aau, o te fariu mai, e o te faarahia 'tu ratou e au. 28 E teie nei, ua haponohia te ora a te Atua nei i te Etene, e e faaroo mai ia ratou, ia ite hoi outou. 29 E oti a'era teie nei parau i te parauhia e ana, haere atura te ati Iuda ma te mārō rahi ratou ratou iho. 30 Parahi atura Paulo e e piti a'era' matahiti i roto i to'na iho fare tarahuhia, e farii maira i te taata atoa e haere atu ia'na ra. 31 Parau maira i te basileia o te Atua, e haapii maira i te mau parau o te Fatu ra o Iesu Mesia ma te māta'u ore, e aore roa e taata i faore atu.

TE EPISETOLE A TE APOSETOLO RA A PAULO

I TO ROMA RA.

Ta Paulo faaileraa mai i to'na toroa.

I PAULO, e tavini no Iesu Mesia, i faarirohia ei aposetolo, ia faataahia no te evanelia a te Atua, 2 (o tei faaitēhia mai i mutaa iho e tana mau propheta i roto i te parau mo'a i papaihia ra.) 3 no ta'na Tamaiti no to tatou Fatu ra no Iesu Mesia, o tei fanau mai i te huaai o Davida, i te haapaora e i te tino ra; 4 i tapao faaitēhia rā i te mana, e o te Tamaiti ia a te Atua, i ta te Varua Maitai ra, i te tia-faahou-raa mai te pohe maira: 5 no'na mai to matou maitai i noaa 'i, e te toroa aposetolo i te mau etene atoa no to'na ra i'oa,

ia noaa ia ratou te haapao faaroo ra: 6 no ratou atoa hoi outou, o tei haapaohia e Iesu Mesia ra: 7 i te feia atoa e herehia mai e te Atua i Roma na, i haapaohia ei feia mo'a: ei ia outou te aroha mau, e te hau no ō mai i te Atua i to tatou Metua ra, e ne ō hoi i to tatou Fatu ia Iesu Mesia ra.

8 E haamaitai na vau i tau Atua, no Iesu Mesia, ia outou atoa na, no te mea, ua parauhia to outou faaroo e ati noa "e te fenua atoa nei. 9 O te Atua hoi ta'u e faaroo ma tau varua atoa, i te evanelia o ta'na Tamaiti, to'u ia ite, e aita vau e faaea i te faahiti ia outou, 10 i te aniraa i ta'u nei pure ma te

faaea ore, ia maitai tau tere i te hopena e nei ia tia i te Atua, ia tae atu ia outou na. 11 E hinaaro rahi hoi to'u ia ite atu ia outou, ia tuu atu vau i ta te varua ia outou na, ia itoito hoi outou. 12 E ia mahanahana hoi au e outou atoa i to tatou faaroo, i to outou e i to'u atoa hoi.

13 Aita rā vau i hinaaro, e au mau taec, e ia ore outou ia ite, e rave rahi to'u opuarua e haere atu ia outou na, (e i tapehia vau,) ia faufaaia ta'u ia outou na, mai te hoē pae Etene atoa ra. 14 E amutarahu vau na te Heleni, e na te taata ēē; na te feia paari, e na te ite ore. 15 E teie nei, ua tia roa ia'u i te parau atu i te evanelia ia outou atoa i Roma na, e hope noa 'tu to'u nei puai. 16 Aore hoi au i haama i te evanelia o te Mesia ra, no te mea, o te mana ia o te Atua, ia ora te feia atoa i faaroo ra; te ati Iuda na e te Heleni atoa hoi. 17 Tei reira hoi te parau-tia a te Atua i te faaroo i te faaitearahia mai ei faaroo-raa, mai tei papaihia ra e, Te feia parau-tia i te faaroo ra, e ora ia. 18 Ua faaitia mai hoi te riri o te Atua mai te ra'i mai, i te mau paieti ore atoa ra, e te mau parau-tia ore atoa a te taata nei, o tei tapea i te parau mau ma te tia'ore ra. 19 No te mea o te mau mea atoa o te Atua e itea ra, te vai noa ra ia ia ratou, ua faaite hoi te Atua ia ratou. 20 Te mau mea hoi no'na e ore e tia ia hi'o ra, te itea-papu-hia nei ia i te mau mea i hamanihia nei, mai te hamanihia mai ā o teie nei ao; oia' hoi to'na ra mana-hope ra e te Atuarua ra; aita 'tura o ratou otohara: 21 no te mea e, ite noā ratou e, e Atua, aita ratou i faateitei ia'na i tei au i te Atua ra, aita hoi i haamaitai atu ia'na, riro atura ia ratou ferurira ei mea faufaa ore, e to ratou ra aau mapa'o ore, pouri atura ia. 22 I faataata paari hoi ratou, e riro atura ratou ei maamaa; 23 ruri ē atura hoi i te maitai o te Atua pohe ore ra, ei hoho'a hamanihia, mai te taata e pohe noa nei te huru, e mai te manu, e te mau mea avae maha, e te mea rii e nec haere nei.

24 I faarue ai te Atua ia ratou, ia rave noa na i te peu faufau i te hinaaro o to ratou iho aau, ia faaino i to ratou iho tino, ratou ratou iho; 25 o tei ruri ē i te parau mau no te Atua ra ei haavare, e ua pure e ua haamorī i tei hamanihia, aore i Tei Hamani, no na te haamaitai mure ore ra. Amene. 26 No reira te Atua i tuu noa 'tu ai ia ratou i te mau hinaaro faufau ra; na ta ratou mau vahine hoi i ruri ē i te mea mau ra i te mea au ore. 27 E te mau tane atoa hoi, faarue atura i te mea mau ra i te vahine, tupu atura to ratou hinaaro ratou ratou iho; e tane e e tane, i te raveraa i te mea

haama ra, e te noaara te hoo i roto ia ratou iho i tei au i ta ratou ra hapa. 28 E o ratou aore i hinaaro i te tapea i te Atua ma te ite atu, ua tuu noa 'tura te Atua ia ratou i to ratou aau au cre ra, ia rave noa na ratou i te mau mea tia ore ra: 29 ua i i te mau parau-tia'ore, e te taata, te hauti, te nounou tao'a, te riri; ua i i te feii, te taparahi taata, te fama'i, te haavare, te tairoiro, e feia olumu, 30 e feia parau faaino, e te hinaaro ore i te Atua, e hamani ino, e teoteo, e faaahaaha, e imi mea ino ra, e faaroo ore i te metua, 31 e haapoo ore, e faarue faufaa, aore e aroha mau, e te riri māhā ore, e te aroha ore; 32 ite noā taua feia ra i te ture a te Atua ra, (e o tei rave i taua mau mea ra, e au ia ratou te pohe,) e rave ā i taua mau mea ra, e ere hoi te reira ana'e ra, te au ra rā i te feia i rave ra.

O tei rave i te hara ra e faahapahia ia, te ati Iuda e te Etene atoa.

2 E TEIE nei, e ore oe e faaitiahia, o tera ra taata, e te taata atoa e faahapa 'tu; i taua mea hoi ta oe i faahapa ia vetahi ē ra, te faahapa atoa ra oe ia oe iho; o oe hoi e faahapa na, te rave atoa ra oe i taua mau mea ra. 2 Ua ite rā tatou e, e au ta te Atua faahapa i te feia i rave i taua mau mea ra, i te parau mau. 3 Te mana'o ra oe, e tera ra taata e faahapa i te feia i rave i taua mau mea ra, e ora oe i te faahapa a te Atua, tei rave atoa oe i taua mau mea ra? 4 E te vahavaha nei anei oe i te hamani maitai rahi a te Atua, e te faaroomai, e te mārū, aita i ite e, ei faatupu taua maitai a te Atua ra i to oe tatarahapa? 5 No te mārū rā, e to tatarahapa ore o to oe aau, te haapue ra oe i te riri ia oe iho i taua mahana riri ra, e te faaiteraa mai i te faahapa tia a te Atua ra, 6 o te faautua mai i te taata atoa, ia au i ta'na ra mau ohipa: 7 i te feia i imi i te hinuhinu, e te tura, e te pohe ore, i te tamau-maite-raa i te parau maitai, o te ora mure ore ia: 8 i te feia rā i mārō, e aore i haapao i te parau mau, i haapao rā i te parau-tia ore ra, o te riri ia, e te pohe rahi, 9 te pohe, e te alo-aho, i te mau varua taata atoa i rave i te ino ra, to te ati Iuda na, e to te Heleni atoa: 10 o te hinuhinu rā, e te tura, e te hau, i te taata atoa i rave i te maitai ra, to te ati Iuda na, e to te Heleni atoa.

11 I te haapao hoi i te huru o te taata nei, aita ia i te Atua. 12 O te feia atoa hoi i rave i te hara ma te ture ore, e pohe ia ma te ture ore; e te feia atoa i rave i te hara ma te ture, e haavahia ia i te ture. 13 (E ere hoi tei faaroo noa i te ture ra, i te feia parau-tia i te aro o te Atua, o tei haapao rā i te ture

ra, o te parauhia ia e, e feia parau-tia. 14 Te Etene hoi aita a ratou ture ra, ia rave noa ratou i ta te ture ra, ore noa 'tu ā ta ratou ture, o ratou iho ā ta ratou ture: 15 ua faaite hua hoi ratou i ta te ture i papaihia i roto i to ratou ra au, te faaite ra hoi to ratou au, e to ratou mana'o te pari ra, e te faatia ra, ratou ratou iho;) 16 Ia tas i te mahana e haava i te Atua i te mau mea moe a te taata nei ia Iesu Mesia ra, i te evanelia na'u nei.

17 Inaha, e i'oa ati Iuda to oe, e te tiaturi ra oe i te ture, te teoteo ra hoi oe i te Atua, 18 ua i te hoi oe i to'na hinaaro, e te ite na hoi oe i te mea maitai, ua haapilihia oe e te ture; 19 te parau na oe ia oe iho e, e aratai i te matapo, e tiarāmā no te feia e parahi i te pouri ra; 20 e haapili i te ite ore, e orometua na te tamarī, tei ia oe hoi to hoho'a o te ite, e te parau mau i roto i te ture ra. 21 O oe hoi o tei haapili ia vetahi ā ra, aita oe i haapili ia oe iho? O oe hoi o tei a'o hua e, eiaha e eia, te eia na hoi oe? 22 O oe hoi o tei parau e, eiaha e faaturi, te faaturi na hoi oe? O oe hoi o tei faafaufau i te idolo ra, te eia na hoi oe i tei haamo'ahia ra? 23 O oe hoi o tei teoteo i te ture ra, te faaino ra hoi oe i te Atua i te faahaparaa i tana ture ra? 24 Ua faainohia hoi te i'oa o te Atua i o te Etene ia outou, mai tei papaihia ra.

25 E faufaa hoi to te peritome ia haapao oe i te ture; e faahapa ture oe ra, ua riro to oe peritome ei peritome ore. 26 E ia haapao te peritome ore i te parau-tia o te ture ra, e ore anei to'na peritome ore e parauhia e, o peritome? 27 E ore anei te peritome ore fanau nei, ia haapao i te ture, e faahapa ia oe i te faahapa ture na, tei ia oe te parau e te peritome? 28 O te ati Iuda rapae au ra, e ere ia oia i te ati Iuda; e te peritome rapae au i te tiuo ra, e ere ia i te peritome; 29 o te ati Iuda roto ra, te ati Iuda; e te peritome au ra, te peritome; eiaha to rapae au, o to te varua rā; o tei ore i haamaitahia e te taata, e te Atua rā.

E ore roa te taata o tiahia i te ohipa a te ture.

3 Eaha hoi ta te ati Iuda vahi i hau? e eaha te faufaa o te peritome? 2 E faufaa rahi ia; o te parau ra a te Atua i tuuhia mai ia ratou ra, te mea rahi. 3 Aore te tahi pae i faaroo ra, eaha to reira? na to ratou faaroo ore anei e faore i te parau mau a te Atua? 4 E ore roa ia: ia riro noa 'tu te taata atoa ei haavare, ei parau mau ā ta te Atua; oia hoi tei papaihia ra e, ia faatiahia oe i ta oc parau, e ia tia ta oe ia feruriria ra. 5 Ia haamaitai rā ta outou parau-tia ore i te parau-tia a

te Atua ra, e nahea tatou? aita anei i hapa te Atua o tei tun mai i te pohe nei? (mai ta te taata ta'u e parau nei) 6 aita roa ia; eaha hoi te Atua e tia i ia haava i to te ao nei i reira? 7 Ua rahi hoi te maitai o te Atua i te parau mau na'na i ta'u nei mana'o hapa, eaha ihora vau o faahapahia mai ai ā ei taata hara? 8 Eahu hoi i ore i tia i ta parau e, E rave tatou i te parau ino ia tupu te maitai? (o tei haavare-haere-hia matou nei, e ta te tahi pae e parau noi e, te ma reira nei matou,) ua tia te faahapa ia ratou.

9 Te aha nei hoi i tele nei? te hau nei tatou? aore roa ia; ua tas hoi ia tatou e, te vai hara noa nei te ati Iuda e te Heleni atoa hoi; 10 oia hoi tei papaihia ra e, Aore roa e taata parau-tia e hoē iti a'e: 11 aore roa te hoē i ite, aore roa te hoē i imi i te Atua. 12 Ua iaarua paatoa ratou i te e'a, ua riro atoa ratou ei feia faufaa ore, aore roa te hoē i rave i te parau maitai, e hoē iti a'e. 13 E vairaa tiapapau ha-māmā noa to ratou arapoa; i parau na to ratou urero i te parau haavare; e te taero aepi i roto i to ratou utu: 14 ua i to ratou vaha i te tuhi e te faaino: 15 e oia to ratou arae i te haamanii i te toto: 16 o te pohe o te mauivi rahi tei to ratou haerea; 17 aita ratou i ite i te e'a hau: 18 aore roa e māta'u i te Atua i mua i to ratou mata. 19 Ua ite hoi tatou o, te mau parau atoa a te ture i parau maira, i parau mai ia i te feia ture ra; ia piri te mau vaha atoa, e ia harahia to te ao atoa nei i mua i to aro o te Atua. 20 E tele nei, aore roa e taata o tiahia mai i mua i te aro o te Atua, i te ohipa a te ture ra: no te ture hoi te ite i te hara.

21 I tele nei rā, ua itea mai nei te parau-tia a te Atua i te ture ore, i faaitēhia mai ia e te ture' o te mau peropheta ra. 22 Oia te parau-tia a te Atua i te faarooa ia Iesu Mesia ra, i te taata atoa e i nia atoa iho i te feia atoa e faaroo ra: aita hoi e huru ē; 23 ua rave paatoa hoi i te hara, e ua ere i te haamaitai a te Atua ra. 24 I tia-noa-hia mai ia e to'na ra aroha mau, i to ora e vai i te Mesia ra ia Iesu; 25 o ta te Atua i tuu mai e faafaitē, ia tiaturi i to'na ra toto, ei faaiteraa mai i ta'na ra parau-tia i te faaēteraa i te mau hara i ravehia i mutaa ihora, i te faaoromairaa o te Atua ra; 26 ei faaiteraa mai hoi i ta'na parau-tia i tele nei, ia tia ta'na parau a tia mai ai oia i te taata i faaroo ia Iesu ra. 27 Eileen ihora hoi te teoteo? Ua faa-orehia ia. Na tehea ture? na te ture ohipa? Aore; na te ture faaroo ra. 28 E tele nei, teie ta matou parau, i

tiahia te taata i te faaroo, eiaha te ohipa a te ture ra. 29 E Atua anei oia no te ati Iuda ana'e ra? e ere anei no te Etene atoa? No te Etene atoa ia: 30 ho'e hoi Atua e tia mai i te peritome i te faaroo, e no te faaroo atoa hoi e tia mai ai i te peritome ore. 31 Te faaore nei anei matou i te ture i te faaroo nei? Aore roa ia: te haamau nei ra matou te ture.

I tiahia Aberahama i te faaroo.

4 EAHA fa tatou parau, i ta to tatou tupuna ra, i ta Aberahama i noa i te tino ra? 2 I tiahia hoi Aberahama i te ohipa ra, e teoteora to'na i reira, eiaha ra i te aru o te Atua. 3 Te nahea maira hoi te parau i papahia ra? Ua faaroo Aberahama i te Atua, e i haapaohia 'tura ia ei parau-tia na'na. 4 O te taata hoi i rave i te ohipa ra, e ore te utua e parauhia e, e mea horoa noa, e hoo ra. 5 O te taata ra aore e ohipa, i faaroo ra ia'na i tei tia mai i te paieti ore, e haapaohia hoi to'na faaroo ei parau-tia na'na. 6 Mai ia Davida hoi parau mai i te maitai o te taata ta te Atua i huri mai i te parau-tia aore e ohipa ra, i te ua ora mai e, 7 Ua maitai te feia i faaorehia ta ratou hara, o tei tapo'ihia to ratou ino. 8 Ua maitai te taata o tei ore roa Iehova e parau e, e hara ta'na.

9 No te peritome ana'e ra anei taua maitai nei, e no te peritome ore atoa anei? te parau nei hoi tatou e, ua haapaohia te faaroo ei parau-tia na Aberahama. 10 I hea hoi te haapaoraahia? ia peritomehia anei, e i te vai peritome-ore-raa ra anei? Eiaha ia peritomehia, i te vai peritome-ore-raa ra. 11 I tuuhia maira ia'na te tapao ra e peritome, ei tapao no te parau-tia i te faaroo ia'na i te vai peritome-ore-raa ra; ia riro oia ei metua no te peritome ore atoa i faaroo ra, ia haapao-atoa-hia te parau-tia no ratou atoa: 12 ei metua hoi no te peritome, no te feia e ere i to te peritome noa ana'e ra, o tei haere atoa ra na te o'a o te faaroo o tei ratou tupuna ra o Aberahama, i to'na ra peritome-ore-raa-hia. 13 E ere hoi i to te ture tei parauhia mai ia Aberahama ra e to'na huanai, e e riro oia ei fatu no te fenua, no te parau-tia ra i te faaroo. 14 Ahiri hoi o ratou o to nia i te ture ra te fatu, ua cro'ga te faaroo, e ua riro tei parauhia maira ei mea faufaa ore. 15 E pohe hoi to te ture; aore e ture ra, aore atoa ia e hara. 16 E teie nei, tei te faaroo ia riro ei mea horoa noa, ia roa mau tei parauhia maira i to'na atoa ra huanai; eiaha to nia i te ture ana'e ra, to nia atou ra i te faaroo o Aberahama, o te fatou atoa nei metua; 17 (oia hoi tei papahia ra e, Ua ha-

paohia oe e au ei metua no te mau fenua atoa e rave rahi,) i mua i te aro o te Atua ta'na i faaroo ra, o tei faaora i tei pohe ra, e o tei parau i te mau mea aore ra, mai te mea e, te vai nei: 18 o tei ore hoi i haapao ra e aore e tia'raa, faaroo atura ia ma te tiai, e e riro oia ei metua no te mau fenua atoa e rave rahi, mai tei parauhia maira e, Mai te reira to oe huanai. 19 E no te mea e ere to'na i te faaroo paruparu, aita oia i haapao e ua pohe to'na tino, ua fatata hoi to'na matahiti i te hanerc, aore hoi i haapao i te pohe i to Sara opu: 20 aita hoi oia i feafeau atu ma te faaroo ore i tei parauhia mai e te Atua ra, i itoito ra oia i te faaroo, ma te haamaitai i te Atua; 21 ua ite papu hoi oia e, o ta'na i parau maira e tia ia ia'na ia faatupu. 22 I haapaohia i hoi te reira ei parau-tia na'na. 23 E ere ra no'na ana'e ra i papahia i e, ua haapaohia na'na; 24 no tatou atoa ra, te feia e haapao-atoa-hia te faaroo ei parau-tia, ia faaroo tatou ia'na i tei faatia faahou i to tatou Fatu ra ia Iesu i nia, mai te pohe maira; 25 o tei tuuhia mai no ta tatou nei hara, e i fuatia-faahou-hia ia ia tiahia tatou nei.

O tei tiahia i te faaroo, e hau to ratou i te Atua ra.

5 E TEIE nei, ua tiahia tatou i te faaroo, e hau to tatou i te Atua ra, i te tatou Fatu ia Iesu Mesia ra; 2 no'na hoi tatou i o ai i te faaroo i roto i teie nei maitai i parahihia e tatou nei, e te oaoa nei i te tia'raa i te maitai o te Atua. 3 E ere hoi te reira ana'o ra, te oaoa atoa nei ra tatou i te mau ati nei; ua ite hoi tatou e, na te pohe e faatupu i te faaoromai; 4 e na te faaoromai e faatupu i te ite; na te ite o faatupu i te tiai: 5 e ore hoi te tiai e faahaama mai, no te mea ua niniihia mai te hinaaro o te Atua i roto i to tatou aau e te Varua Maitai i horoahia mai ia tatou nei. 6 I to tatou vai-paru-paru-raa ra hoi i pohe ai te Mesia i te tau mau ra, no te feia paieti ore ra. 7 E ore hoi te ho'e e haapohe no te tahi taata parau-tia, o faaoromai ra paha to ho'e taata 'tu i te pohe no te taata maitai. 8 Ua faarahi ra te Atua i to'na aroha ia tatou nei, i te mea te vai taata hara noa nei a tatou, i pohe ai te Mesia no tatou nei. 9 E teie nei, ua tiahia tatou i to'na ra toto, e rahi atu ia to tatou ora ia'na ra i te pohe. 10 I faafaitelia hoi tatou i te Atua i to tatou vai-enemi-raa ra i te pohe o ta'na Tamaiti; e rahi atu ia to tatou ora i te faitearaa nei, i to'na ra oraraa. 11 E ere hoi te reira ana'e ra, te oaoa nei ra tatou i te Atua, i to tatou Fatu ia Iesu

Mesia, no'na i noaa 'i ia tatou taua faiteeraa nei.

12 E teie nei, no te taata hoê ra i ô mai ai te ino i te ao nei, e no te ino hoi te pohe; e ua taea-atoa-hia te taata atoa e te pohe i te mea ua hara paatoa; 13 (i vai na hoi te hara i te ao nei e tae roa a'enei i te ture nei; e ore râ te hara e haapaohia i te ture ore. 14 I mana na râ te pohe mai ia Adamu mai â e tae roa a'enei ia Mose, e i te feia atoa aore i rave i te hara mai te hara a Adamu, e hoho'a oia no te tae mai. 15 Eita râ tei horoa-noa-hia mai e au i taua hara ra. E rave rahi tei pohe i te hara a te taata hoê ra, e rahi atu hoi te aroha o te Atua, e tei horoahia mai e taua aroha ra, i te tae i te taata e rave rahi, ia Iesu Mesia i te taata hoê ra. 16 E ere hoi mai ta te taata hoê i rave i te hara ra, tei horoa-noa-hia mai; no te hara hoê hoi te utua faahapa, area tei horoa-noa-hia maira, ia tiahia maira ia i te hara atoa e rave rahi. 17 No te hara hoi a te taata hoê ra, i mana 'i te pohe i taua taata hoê ra: te feia hoi i noaa ia ratou te maitai rahi, e te parau-tia i horoahia maira, e rahi atu ia to ratou mana i te ora i te taata hoê ra, ia Iesu Mesia.) 18 E teie nei, mai te taata atoa i taea i te utua faahapa i te hara a te taata hoê ra, ua taea-atoa-hia te taata atoa i te tia ia ora, i te parau-tia a te taata hoê ra. 19 Mai te taata atoa hoi e rave rahi i faarirohia ei taata hara i te haapao ore o te taata hoê ra, e rave rahi hoi tei faarirohia ei taata parau-tia, i te haapao o te taata hoê ra. 20 Faaô maira hoi te ture ia rahi te hara. Te vai râ i rahi ai te hara ra, ua rahi roa te hamani maitai i reira. 21 Mai te hara hoi i tupu a'enei e ua pohe, ia tupu atoa hoi te aroha i te parau-tia, e tae noa 'tu i te ora mure ore i to tatou Fatu ra ia Iesu Mesia.

E ore roa e tia i te feia faaroo ia rave i te hara.

6 E NAHEA hoi tatou nei? e tamau â tatou i te rave i te hara ia rahi te aroha? 2 Eiaha roa ia; o tatou hoi o tei pohe i te hara ra, eaha hoi tatou e ora 'i i te reira; 3 Aitâ outou i 'ite o tatou atoa tei bapetizohia i roto i te Mesia ra ia Iesu, ua bapetizohia ia i roto i to'na ra pohe? 4 E teie nei, ua tanuhia tatou e oia atoa, i te bapetizohia i roto i to'na ra pohe; mai te Mesia i faatiahia e te mana o te Metua i te poheraa ra, ia haapao atoa tatou i te haerea e au i te ora api. 5 I apiti-atoa-hia hoi tatou ia'na i te huru o to'na ra pohe, e apiti-atoa-hia ia tatou i te huru o to'na ra tia-faahou-raa i nia. 6 Ua ite hoi e ua faasataurohia to tatou

taata tahito e oia atoa hoi, ia paruparu te tino o te ino, ia ore tatou ia faaroo tavini faahou i te ino nei. 7 O te taata hoi i pohe ra, ua mataa ia oia i te ino nei. 8 I pohe na hoi tatou e te Mesia atoa, ua ite hoi tatou e, e ora tatou e oia atoa hoi. 9 Ua ite hoi tatou e, o te Mesia i faatiahia i te poheraa ra, e ore ia e pohe faahou, e ore hoi e mana faahou te pohe ia'na. 10 Oia hoi i pohe ra, i pohe ia i te hara, hoê roa ra poheraa; oia râ i ora ra, i ora ia i te Atua.

11 E mana'o atoa hoi outou ia outou iho, e ua pohe mau i te ino ra, ia ora râ outou i te Atua, i to tatou Fatu ra ia Iesu Mesia. 12 E teie nei, eiala ia vai hau te ino i roto i to outou na tino pohe noa, a faaroo hoi outou i te reira i to te tino ra hinaaro. 13 Eiaha hoi e horoahia to outou tino ei mauhaa na te ino i te parau-tia ore ra; e horoa râ ia outou iho i te Atua, e to outou tino ei mauhaa na te Atua i te parau-tia ra, mai te feia i pohe ra, e ua ora. 14 E ore hoi te ino e faahepo mai ia outou, aita outou i raro a'e i te ture, tei raro a'e râ outou i te aroha. 15 E nahea hoi tatou? e rave tatou i te hara no te mea tei raro a'e tatou i te aroha, aore i raro a'e i te ture ra? Eiaha roa ia. 16 Aita outou i ite e, o ta outou i horoa ia outou iho ei tavini ei faaroo atu ia'na, e tavini ia outou no'na no ta outou e faaroo ra; no te ino ra e pohe atu, no te reira ia, no te haapao e noaa 'tu te parau-tia ra, no te reira ia? 17 Ia haamaitahia râ te Atua i te mea o outou te tavini o te ino na, e ua faaroo ma te au atoa i te hoho'a parau i tuulhia 'tu ia outou na. 18 E ua faatiamâhia outou i te ino, ua riro iho nei ra outou ei tavini no te parau-tia. 19 Te parau nei hoi au i ta te taata nei, no te paruparu hoi o to outou tino, mai ia outou i horoa noa i to outou tino ei tavini no te mea faufau, e te ino ei rave i te ino ra; e horoa outou i to outou tino ei tavini no te parau-tia ei rave i te maitai. 20 I to outou tavinira i te ino ra, aore a outou parau-tia i reira. 21 Eaha hoi ta outou faufaa i noaa i taua mau mea ra ta outou e haama i teie nei? e pohe hoi te hopea o taua mau mea ra. 22 I teie nei râ, ua faatiamâhia outou i te ino, e ua riro ei tavini no te Atua, o te maitai ta outou e faatupu, e e ôra mure ore hoi ia te hopea. 23 E utua te pohe no te hara, area te ora mure ore ra, e mea horoa-noa-hia mai ia e te Atua i roto i to tatou ra Fatu ia Iesu Mesia.

E hinaaro te feia faaroo i te ture a te Atua.

7 AITA outou i ite, e au mau taea (te parau atu nei hoi au i te feia i ite i te ture nei,) e te vai mana ra te ture i

nia iho i te taata nei i to'na oraraa nei? 2 Te valine tara tane ra, te ora ra *te tane*, e ati atu oia i *tana* ra tane, o ta te ture ia; ia pohe rā te tane, ua matara ia oia i te ture i *tana* ra tane. 3 I riro ō oia i te hoē taata ē te ora ra te tane, e parauhia ia oia i te faaturi; ia pohe rā te tane ra, ua matara oia i taua ture ra; e ere ia oia i te faaturi, ia faaipou i te hoē taata ē ra. 4 Oia atoa hoi outou, e au mau taeae ra, ua pohe atoa outou i te tino o te Mesia, i te haapaoraa i te ture ra, ia riro outou no vetahi ē, no te faatiahia i te poheraa ra, ia faahotu hoi tatou i te huero na te Atua. 5 Tei nia tatou i ta te tino ra, te mau hinaaro iino i raro a'e i te ture ra, te puai ra ia i roto i to tatou tino, i te faahoturaa i te huero e pohe ai ra. 6 I teie nei rā, ua tatarahia tatou i te ture, ua pohe hoi te mea i mau ai tatou ra; ia haamori tatou ma te aau api, eiaha ma te parau tabito ra. 7 E nahea hoi tatou i teie nei? Te ino ra anei te ture? aore roa ia. Auaa te ture, e ore hoi au e ite i te ino; e ore hoi au e ite e, e *hara* te nounou, auaa te ture i parau mai e, Eiaha oe e nounou. 8 Noaa ihora rā ta te ino ravea i te ture, e ua faatupu oia i te nounou e rave rahi i roto ia'u. I te oreraa hoi te ture ra, e mea pohe te ino i reira. 9 I ora na hoi au i mutaa iho i te ture ore ra, ia tae mai rā te ture ra, te ora noa ra te ino, pohe ihora vau. 10 E te ture hoi i *haapaohia* ei ora ra, riro atura ia ei pohe no'u. 11 Noaa ihora hoi ta te ino ravea i te ture, e haavare maira ia'u, pohe ihora vau ia'na i te ture. 12 E teie nei, e mea mo'a te ture, e mea mo'a hoi te parau, e te hapa ore, e te maitai. 13 I riro mai anei taua mea maitai ra ei pohe no'u? Aita roa ia: O te ino rā ia itea i taua mea maitai ra, e e ino, o te riro ia ei pohe no'u; ia riro te ino ei mea ino rahi roa i te ture. 14 Ua ite hoi tatou e, no te varua te ture, no te tino rā vau, i hoochia i raro a'e i te ino. 15 O ta'u hoi e rave nei, aore hoi au i faatia: e o ta'u hoi i hinaaro ra, aore au i rave; o ta'u ra mea hinaaro ore ra, o ta'u ia e rave nei. 16 Te rave nei au i te mea hinaaro-ore-hia e au ra, te faatia ia nei au i te ture, e e mea maitai ia. 17 E teie nei, e ere ia vau tei rave ra, o te ino rā i vai i roto ia'u nei ra. 18 Ua ite hoi au e aore roa e mea maitai i vai i roto ia'u (i roto i tau tino nei,) o te hinaaro rā, te fatata nei ia ia'u, area te rave i te mea maitai ra, aita ia i itea ia'u. 19 O te maitai hoi ta'u i hinaaro ra, aore ia vau i rave: area te ino hinaaro-ore-hia e au ra, o ta'u ia e rave nei. 20 Te rave nei au i te mea hinaaro-ore-hia e au ra, e ere ia vau tei rave ra.

o te ino rā i vai i roto ia'u nei ra. 21 Te ite nei au i te hoē ture, e ia hinaaro vau i te rave i te mea maitai ra, tei pihai iho te ino ia'u i reira. 22 Te oaca nei hoi au i te ture a te Atua, i te haapaoraa i te taata i roto ra; 23 te ite nei rā vau i te tahi ture i roto i tau tino nei, i te mārōraa mai i te ture i roto i tau aau nei, e te *farirōraa* ia'u ei titi na te ture ino i roto i tau tino nei. 24 Auē hoi au o te taata ati rahi e! na vai ra vau e faaora i teie nei tino pohe? 25 E haamaitai au i te Atua, i to tatou Fatu ra ia Iesu Mesia. E teie nei, te haapao nei tau varua i te ture a te Atua, area tau tino nei, o te ture ia o te ino.

Aore roa e faahaparaa i te feia e haapao i ta te Varua ra.

8 AITA 'tura e faahapa i teie nei i te feia i roto i te Mesia ra ia Iesu, o tei pee i ta te Varua ra, aore i ta te tino. 2 Ua faatiamā mai hoi te ture a te Varua ora i roto i te Mesia ra ia Iesu ia'u, i te ture ra o te ino e te pohe. 3 Te mea aore roa i tia i te ture ra, no te mea e paruparu to te ture i te taata nei, ua *tia iho nei ra* i te Atua i te tonoraa mai i ta'na Tamaiti, mai te taata ino nei te huru, e ei tarachara hoi, ua tinai oia i te ino i roto i te taata nei; 4 ia tia te parau-tia a te ture i roto ia tatou nei, o tei ore i pee i ta te tino, i ta te Varua rā. 5 Te feia hoi i au i ta te tino ra, te haapao ra ia i ta te tino; area te feia i au i ta te Varua ra, te *haapao ra ia* i ta te Varua. 6 O te haapao hoi i ta te tino ra, o te pohe ia; area o te haapao i ta te Varua ra, o te ora ia e te hau. 7 No te mea o taua hinaaro o te tino ra, e mea au ore ia i te Atua; e ore hoi te reira e aurora i te ture a te Atua, e ore hoi e *tia ia na reira*. 8 E teie nei, te feia i au i ta te tino ra, e ore roa te Atua e maururu ia ratou. 9 Aore rā outou i au i ta te tino rā, *te au nei rā* i ta te Varua ra, no te mea te parahi ra te Varua o te Atua i roto ia outou. Te ere ra rā te hoē taata i te Varua o te Mesia ra, e ere ia oia i *te taata* no'na. 10 E tei roto te Mesia ia outou ra, te ora nei ia te varua i te parau-tia, ua pohe mau rā te tino i te hapa. 11 Te parahi ra to'na varua i roto ia outou to tei faatia ia Iesu i te poheraa ra, o tei faatia i te Mesia i te poheraa ra, na'na atoa ia e faaora i to outou mau tino pohe ra i to'na Varua i parahi i roto ia outou na. 12 E teie nei, e te mau taeae ra, e amutarahu tatou, e ere ra i ta te tino a haapao atu ai i ta te tino ra. 13 Ia haapao hoi outou i ta te tino ra, e pohe ia outou; ia tinai rā outou i ta te tino ra i te Varua, e ora ia outou. 14 O te feia atoa hoi i arataihia e te Varua o te

Atua ra, e tamarii ana'e ia ratou na te Atua. 15 E ere hoi i te varua tavini nei noa ia outou ia mātā'u faahou; o te Varua faatamarii rā tei noa ia outou, i parau ai hoi tatou, E Aha, e tau Metua. 16 O te Varua iho hoi, e to tatou atoa nei varua, o te faaita ia e, e tamarii tatou na te Atua. 17 E tamarii ra, e feia tufaa ia; e feia tufaa i te Atua ra, e feia tufaa tatou e te Mesia; te pohe apipiti nei hoi tatou e oia atoa, ia haamaitai-apipiti-hia tatou e oia atoa hoi. 18 Te parau nei hoi au, e ore teie nei mau pohe e au ia faito i te maitai e faaitehia mai ia tatou nei. 19 Te hinaaro rahi o te mau mea hamanihia nei ma te faaooa, te tia nei ia i te faaiteraahia mai o te tamarii a te Atua. 20 (Ua faarirohia hoi te mau mea hamanihia nei ei mea faufaa ore noa, e ere ra i te mea hinaaro, na'na rā na tei faariro ei mea faufaa ore noa ma te tia,) 21 e faaorahia hoi te mau mea hamanihia nei i te tapea ra o te pohe, ia noaa te tiamā maitai o te tamarii a te Atua ra. 22 Ua ite hoi tatou e, te uuru tahi nei te mau mea atoa i hamanihia nei ma te mauui fanau ra e tae roa a'enei i teie nei mahana. 23 E ere hoi o ratou ana'e ra, o tatou atoa nei, o tei noaa te huero matamua a te Varua ra, o tatou iho ā tei uuru i roto ia tatou iho, i te tatariraa 'tu i te faatamarii-tavai-raa, oia te faaroraraa i to tatou nei tino. 24 E ora hoi tatou i te tia, o te tiaira hi'ohia ra, e ere ia i te tia; o ta te taata hoi i ite ra, eaha oia e tia i ia tia atu i te reira? 25 I tia rā tatou i tei ore i itea e tatou, te mana'o nei hoi tatou i te reira ma te fatimau ore. 26 Te turu atoa mai nei hoi te Varua i to tatou nei paruparu, aore hoi tatou i ite maitai i te mea au ia pure tatou; na te Varua iho i ani i ta tatou ma te uuru e ore e tia ia parau ra. 27 Ua ite ra oia o tei pahu i te sau ra i to te Varua hinaaro, o tei ani i ta te feia mo'a ra, i tei au i to te Atua ra hinaaro. 28 Ua ite hoi tatou e, te faatupu nei te mau mea atoa i te maitai no te feia hinaaro i te Atua, te feia i parauhia mai i te opuara na'na ra. 29 O ta'na i ite i mutaa ihora, o ta'na atoa ia i haapao atea noa ia faaahia mai ta'na Tamaiti ra te huru, ia riro oia ei matahiapo i te mau taene atoa e rave rahi ra. 30 E o ta'na hoi i haapao atea noa ra, o ta'na atoa ia i parau maira, e o ta'na hoi i parau maira, o ta'na atoa ia i faatia; e o ta'na hoi i faatia ra, o ta'na atoa ia i hopoi i te ao.

31 E nahea hoi tatou i teie nei mau parau? No tatou te Atua ra, e tia ia vai ia mārō mai? 32 O tei ore i faaherehere i ta'na iho Tamaiti, o tei tuu noa mai rā ia'na no tatou atoa nei, eaha hoi oia e ore e horoa atoa mai ai i te mau

mea atoa no tatou? 33 Na vai e tuu mai i te pariraa i tei maitihia e te Atua ra? Na te Atua anei na tei faatia mai? 34 Na vai e faahapa mai? Na te Mesia anei na tei haapohe; e ua tia faahou a'enei i nia, e tei te rima atou o te Atua ra. te tia ra ia tatou? 35 Na te aha e faataa ē ia tatou i te aroha o te Mesia ra? na te ma'i anei, e na te ahoaho, e na te hamani ino, e na te poia, e na te veve, e na te ati, e na te 'o'e anei? 36 Mai tei papaihia ra e, No oe matou i taparahihia i aore i faaea, ua faarirohia matou mai te mamoe i haapaohia no te pohe ra. 37 E ore, e riro te re i taua mau mea atoa nei ia tatou, i tei aroha mai ia tatou nei. 38 Ua ite mau hoi au e, e ore te pohe, e ore hoi te ora, e ore te mau melahi, e ore hoi te hui arii, e ore te mau mea mana, e ore te mau mea e vai nei, e ore hoi te mau mea e tupu a muri atu, 39 e ore te teitei, e ore hoi te haehaa, e e ore atoa te mau mea i hamanihia nei, e tia ia faataa ē ia tatou i te aroha o te Atua, i roto i to tatou Fatu ia Iesu Mesia ra.

To Paulo aroha i te ati Iuda.

9 E PARAU mau hoi ta'u i te Mesia, aore au i haavare, te faaita apipiti mai nei te Varua Maitai e tau au ia'u, 2 e e oto rahi to'u, e te mauui tuu ore i roto i tau au. 3 E tia hoi ia'u ia anatemahia vau e taa ē atu vau i te Mesia ra, i tau mau taee, to'u ra fetii i te haapaoraa i te tino nei. 4 I te ati Iseraela ra, no ratou te faatavai ra, e te anaana, te faufaa ra, e te ture i horoahia ra, e te haamoriraa, e tei parauhia maira; 5 no ratou hoi te feia tupuna, e no ratou te Mesia i te haapaoraa i te tino ra, o te Atua ia i nia iho i te mau mea atoa, no'na te haamaitai mure ore. Amene.

6 E ore roa hoi e tia ia mana'o e ua ore te parau a te Atua. E ere to Iseraela 'toa i te Iseraela mau. 7 E ere hoi ratou atoa i te tamarii, i te mea e huaai ratou no Aberahama, e parauhia rā to oe huaai e no Issaka. 8 Teie taua parau ra, Te tamarii a te tino nei, e ere ratou i te tamarii na te Atua; o te tamarii rā no te parau i parauhia maira, o tei haapaohia ia ei huaai. 9 Teie hoi taua parau i parauhia maira, Ia ta e i te tau mau ra e tae mai ai au, e e tamaitihia ta Sara. 10 E ere hoi o te reira ana'e ra, a hāpū atoa 'i hei Rebeka i te hoō taata i to tatou metua ra ia Isaaka: 11 aita hoi te tamarii i fanau, aore hoi i rave i te maitai e te ino, ia tupu tei haapaohia e te Atua i te maitiraa ra, (eiaha ia riro no te ohipa, no'na rā no tei parau maira.) 12 I parauhia 'tu ai oia e, E riro te matahiapo ei tavini no tei muri a'e, 13 mai tei papaihia ra e, Ua hina-

aro vau ia Inkoba, aita râ vau i hinaaro ia Esau.

14 E teie nei, eaha ta tatou parau? E parau-tia ore anei ta te Atua? Eiaha roa ia. 15 Ua parau hoi oia ia Mose e, E faaherehere au i ta'u i hinaaro i te faaherehere ra, e aroha hoi au i ta'u i hinaaro i te aroha ra. 16 E teie nei, e ere i to te hinaaro, e ere hoi i to te horo, no te Atua râ i aroha maira. 17 Te parau ra hoi te parau i papaihia ra ia Pharao e, O te mea mau teie i faateitei ai au ia oe i nia, ia itea tau mana ia oe na, e ia faate-haere-hia tau i'oa e ati noa 'e te fenua atoa. 18 E te aroha nei oia i ta'na i hinaaro i te aroha, e ta'na i hinaaro i te faaetaeta ra, te faaetaeta nei ia.

19 E parau mai anei oe ia'u e, Eaha hoi oia i faaino mai ai? O vai hoi tei faaore i to'na hinaaro? 20 Eiaha na râ, e tera ra taata e, o vai hoi oe a mârô atu i te Atua? E parau atu anei te mea hamanihia i te hamani ia'nu ra e, Eaha oe i na reira 'i i te hamani ia'u nei? 21 Eita anei e au i te potera ia hamani i te tahi farii no te mea maitai, e te tahi farii no te mea ino, i te pueraa repo hoê ra? 22 Eaha hoi te Atua, ia hinaaro i te faaite i to'na riri, e ia itea to'na mana i te faaoromairaa roa i te mau farii no te riri i faaahia no te pohe ra: 23 e ia hinaaro hoi oia i te faaite i te rahiraa o to'na maitai, i te mau farii o te aroha i faaau-atea-hia e ana no te ao; 24 oia hoi tatou nei, o tei parahia mai e ana, eiaha o to te ati Iuda ana'e ra, o to te Etene atoa nei râ. 25 O ta'na atoa hoi i parau i te peropheta ra ia Hosea e, O te feia e ere i te taata no'u ra, e parahia ia e au e, e taata no'u; e tei ore i herelia ra, e parahia ia, o te herelia. 26 E te vahi i parahia 'tu ai ratou ra e, E ere outou i te taata no'u, e riro ia ratou i te parahia i reira e, e tamarii na te Atua ora râ. 27 Te pii hua ra hoi Isaia ia Iseraela e, Mai te one talatai noa iho â ta Iseraela tamarii ia tâto ra, o te tahi pae â te ora. 28 Te faaoti nei hoi oia e te ooti potu nei i ta'na ohipa ma te parau-tia: e ohipa potu hoi ta Iehova e rave i te fenua nei. 29 Mai ta Isaia hoi i parau i mutaa iho ra e, Ahiri Iehova sabaota aore i vaiiho i te huaai no tatou, ua au tatou ia Sodoma, e na faarirohia mai ia Gomora ra.

30 E teie nei, eaha ta tatou parau? toje, Ua noaa te parau-tia i te Etene, o tei ore i titau i te parau-tia ra, te parau-tia i noaa i te faaroo ra. 31 O Iseraela râ, o tei titau i te parau-tia a te ture ra, aita ia i taee ia ratou te parau-tia a te ture ra. 32 Eaha te mea i ore ai? No te mea aore ratou i na te faaroo i te ini, na te ohipa râ a te ture. Ua turori hoi ratou i taua ofai turoriraa ra; 33 mai tei papaihia ra e, Inaha, e tuu vau i te

ofai turoriraa i Siona, e te pãpã ei maheaituraa; e o te faaroo atoa ia'na ra, e ore ia e haama.

Itoito rahi to Iseraela, e ere râ te itoito ite.

10 E AU mau taee e, teie hoi te hinaaro mau i tau aau, e ta'u nei pure i te Atua ia Iseraela, ia ora ratou. 2 O vau te ite ia ratou, e itoito to ratou i ta te Atua, e ere râ i te itoito ite. 3 No to ratou ite ore i te parau-tia a te Atua, o ratou hoi i titau ia tupu ta ratou iho parau-tia, aita a'enei ratou i auroro maite i te parau-tia a te Atua ra. 4 O te Mesia hoi te faahope i te ture ei parau-tia na te feia atoa e faaroo ra. 5 Ua faaite mai hoi Mose i ta te ture ra parau-tia O te taata e haapao i teie nei mau parau, e ora ia i taua mau parau ra. 6 Area te parau-tia i te faaroo ra, te na ô maira ia, Eiaha oe e parau i roto i to aau na e, Na vai e paiuma i nia i te ra'i? (ei aratai mai i te Mesia i rarō nei.) 7 E na vai e hopu i raro i te moana? (ei aratai faahou mai i te Mesia mai roto mai i te pohe.) 8 E te nahea mai râ oia? Tei pihai iho te parau ia oe, tei roto i to vaha, e tei roto i to aau, oia hoi te parau o te faaroo ta matou e faaite nei. 9 Ia fa'i hoi to vaha i te Fatu ra ia Iesu, e ia faaroo to aau e ua faatia te Atua ia'na i te poheraa ra, e ora ia oe. 10 O te aau hoi to te taata nei i faaroo, e ia roaa 'tu te parau-tia; o te vaha hoi tei fa'i i te parau, e ia roaa 'tu te ora. 11 Te parau maira hoi te parau i papaihia ra e, O tei faaroo atoa ia'na ra, e ore ana'e ia e haama. 12 Aita roa hoi e huru ô i te ati Iuda e te Heleni, e hamani maitai rahi hoi to te Fatu o te mau mea atoa nei, i te taata atoa i tiaoro atu ia'na ra. 13 O te tiaoro atoa hoi i te i'oa o Iehova ra, e hope roa ia i te ora.

14 Eaha ra te taata nei e tia 'i ia tiaoro atu ia'na, i tei ore i faaroohia e ratou ra? e eaha hoi ratou e tia 'i ia faaroo ia'na, i tei ore ratou i ite ia'na? e eaha hoi ratou e ite ai i te faaite ore? 15 Eaha hoi te taata nei e tia 'i ia faaite ia ore ratou ia tonohia? oia hoi tei papaihia ra e, O te nehenehe o te avae o te feia i hopoi mai i te parau oaoa o te hau e, o tei hopoi mai i te evanelia o te maitai ra e! 16 Aita râ ratou i faaroo paatoa i te evanelia. Te na ô ra hoi Isaia, E Iehova, o vai tei faaroo i ta matou parau? 17 Na te ite maori e noaa 'i te faaroo, e na te parau a te Atua i parahia maira te ite. 18 Teie râ ta'u parau, Aitâ ratou i ite? Ua ite ia; ua reva to ratou re'o i te mau fenua atoa, e ua taee ta ratou parau i te hopea mai o te fenua ra. 19 Teie hoi ta'u parau, Aitâ Iseraela i ite? O Mose hoi tei parau na e, E faatupu vau i to ontou feii i te feia

nunaa ore; e to outou riri i te fenua haapao ore ra. 20 Te na ô maira râ Isala ma te mâta'u ore, Ua itea vau i te feia aore i imi ia'u; ua faaitheia vau i te feia aore i ui ia'u. 21 Area ia Iseraela ra, te na ô maira oia, I faatoro noa na vau i tau rima i te feia faaroo ore e te mârô, e hope noa a'enei te mahana.

Aita te Atua i faarue i to'na taata ta'na i ile i mutaa ihora.

11 E TEIE nei, teie ta'u parau, Ua faarue anei te Atua i to'na taata? Aore roa ia. E ati Iseraela atoa hoi au, no te huaai o Aberahama, no te opu o Beniamina. 2 Aitâ te Atua i faarue i to'na taata ta'na i ile i mutaa ihora. Aita outou i ile i ta te parau i papaihia ra i parau mai ia Elia ra? ia'na i parau atu i te Atua ia Iseraela ra, a na ô atu ai ra e. 3 E Iehova, ua taparahi ratou i te mau peropheta na oe, e ua taihitumu i te mau fafa na oe, e o vau ana'e ihu nei te toe, e te titau mai nei ratou ia'u ia pohe. 4 Te nahea maira râ ta te Atua parauraa mai ia'na? Ua vaiihohia e au e hitu tamsani taata no'u, aore â ratou i tuu i te turi i mua ia Baala. 5 Oia atoa i teie nei, te vai nei te tahi pae no te maitira a te aroha mau ra. 6 E no te aroha mau ra, e ere atura ia i to te ohipa: no reira ra, e ere atura te aroha mau i te aroha mau i reira. E no te ohipa ra, e ere atura i to te aroha mau: no reira ra, e ere atura te ohipa i te ohipa i reira.

7 Eaha hoi taua parau nei? Aitâ i noa ia Iseraela ta'na i imi ra; ua noa râ i tei maitihia ra, e ua haamatapohia te tahi pae, 8 (oia hoi tei papaihia ra e, Ua tuu mai te Atua i te varua taoto rahi ia ratou, te mata hi'o ore, e te tari'a faaroo ore;) e tae roa a'enei i teie nei mahana. 9 Ua parau hoi Davida, Ia riro ta ratou amuraa ei upe'a, e ei marei, ei turoriraa, e ei utua hoi na ratou. 10 Ia haapouribia to ratou mata, ia ore ratou ia ite, e ia pi'o to ratou tua i raro eiaha ia faaea. 11 E ui na râ vau, Ua turori hi'a roa anei ratou? Eiaha roa ia; ua tae râ te ora i te Etene i taua turori no ratou ra, ei faaroo atu ia ratou ia tipaupau. 12 E teie nei, o taua turori no ratou ra ta to te ao nei ia faufaa, e to ratou ereraa, o to te Etene ia faufaa, a tae ai hoi i to ratou rahiraa? 13 O outou o te Etene ta'u e parau atu nei, te haamaitai nei au i to'u nei toroa, no te mea o vau te aposetolo a te Etene: 14 peneia'e o te oro faatipaupau to'u ra nunaa ia'u, e ia ora te tahi pae. 15 To ratou faarueraahia ra, o te faine ia o to te ao, a tae ai hoi i te fariiraa 'tu ia ratou, e ore anei e riro mai te ora no te pohe mai? 16 Te mo'a ra te hoturaa matamua ra, oia atoa te rahi atoa; e te

mo'a ra te tumu ra, oia atoa te mau amaa. 17 E i ofene-ê-hia tahi pae i taua mau amaa ra, e o oe hoi, e te amaa o te tahi olive ê ra, tei poihia i roto ia ratou, e tei ia oe atoa te tumu e te hinu o taua olive ra; 18 eiaha oe e faaroo teoteo atu i to mau amaa ra. Ia teoteo hoi oe ra, e haamana'o e ere oe te mau i te tumu, o te tumu râ te mau ia oe. 19 E parau mai anei oe e, I ofene-ê-hia te mau amaa ia poihia vau i roto. 20 Ua tia ia; no te faaroo ore i ofene-ê-hia i ratou, e e tia faaroo hoi to oe. Eiaha ei sau teitei, ei mâta'u râ. 21 Aore te Atua i faaherehere i te mau amaa mau ra, e ara, o te ore atoa hoi oia o te faaherehere ia oe: 22 e teie nei, a hi'o na i te hamani maitai e te faaherehere ore a te Atua, faaherehere ore i te feia i hi'a ra, area ia oe ra, o te hamani maitai ia, ia haapao tamau oe i to'na hamani maitai, aore râ, e ooti-ê-atoa-hia oe.

23 E o ratou atoa hoi, ia ore ratou ia tamau mârô i te faaroo ore ra, e poihia ia i roto; e tia hoi i te Atua ia poi fahou ia ratou i roto. 24 I ooti-ê-hia mai oe no nia i te olive oviri mau, e i poi-ê-hia oe i roto i te olive maitai: a tae ai hoi ia ratou i te amaa mau ra, e poihia mai ia i roto i to ratou iho olive! 25 Aore hoi au i hinaaro, e au mau taeae, e ia ore outou ia ite i teie nei parau aro (o te teitei hua hoi to outou mana'o ia outou iho;) e ua roohia Iseraela i te pouri poto, e ia ô atoa mai te rahi atoa o te Etene ra. 26 E ora paatoa 'i Iseraela atoa: oia hoi tei papaihia ra e, E tae mai te Faaora mai roto mai ia Siona, e e faaore oia i te paietoi ore i Iakoba ra. 27 E o ta'u â hoi teie faufaa ia ratou ra, ia hopeni ê atu vau i ta ratou ra hara. 28 I te haapaoraa i te evanelia nei, ua riro ia ratou ei enemi ia outou: area i te maitira te herhia nei ia ratou no to ratou feia metua. 29 O ta te Atua hoi i faoereraa. 30 Mai ia outou hoi aore i faaroo i te Atua i mutaa ihora, e teie nei râ, ua arohahia mai outou i to ratou faaroo ore ra: 31 oia atoa hoi ratou na ore a'enei ua faaroo i teie nei, o outou i arohahia mai, ia aroha-atoa-hia mai ratou. 32 E faaroo ore ana'e hoi ratou atoa i te vaiihoraahia e te Atua, ia aroha mai oia ia ratou atoa.

33 Auê te rahi hau ô atu o te paari e te ite o te Atua e! e te imiraa ore o tana faaauraa, e tana mau haerea i te itea ore ia imi e! 34 O vai hoi tei ite i te auu o te Fatu? e o vai to'na a'o atu? 35 O vai hoi tei horoa 'tu i te faufaa na'na, e faloo-falohou-hia mai ia oia? 36 No'na mai hoi, e na'na, e no'na te mau mea atoa nei: ei ia'na te haamaitai mure ore. Amenc.

*E haapao te feia faaroo i to te Atua ra
hinaaro e tia 'i.*

12 E TEIE nei, e au mau taeae ra, te a'o atu nei au ia outou ma te aroha rahi o te Atua, e ia pūpū atu outou i to outou mau tino ei tusia ora, e te mo'a, e te au hoi i te Atua ra, o te haamori au ia ia outou. 2 E eiaha e faaau, atu i teie nei ao; ei huru ê rā to outou i te faahouraa i to outou aau, ia ite outou i taua hinaaro tia o te Atua ra, e te au, e te maitai hoi. 3 Teie ta'u parau ia outou atoa e ati noa a'e, i te maitai i horoahia mai ia'u nei, eiaha ia hau te mana'o ia'na iho, i tei au ia'na ia mana'o ra: e haapao maite rā i te mana'o, ia au i te huru o te faaroo i tufahia e te Atua i te taata atoa ra. 4 Mai ia tatou hoi e rave rahi te melo i te tino hoê nei, e ere rā e, hoê ā toroa to taua mau melo nei; 5 oia atoa hoi tatou, rahi noa iho ā latou, hoê ā ia tino i te Mesia, e e melo hoi tatou no tatou iho e ati noa 'e. 6 E e toroa ê ana'e to tatou, e au i te maitai i horoahia mai ia tatou nei, e tohu ra, e tohu tatou i tei au i te huru o te faaroo ra; 7 e toroa diakono ra, e rave tatou i te toroa diakono ra; e o tei haapii ra, ei te haapii ia; 8 e o tei faaitoito ra, ei te faaitoito ia; e o tei tufa i te tao'a ra, e rave oia i te reira ma te horoa mau; o tei faaite ra, ia faaite ia ma te haapao maitai; o tei hamani maitai haere ra, ia na reira oia ma te aau tae.

9 Ei aroha haavare ore ā. Ia riarā i te ino; ia ati atu i te maitai. 10 Ei atiraa aroha mau to outou ia outou iho, i te aroha taeae ra; i te faaturaraa 'tu te tahi i te tahi. 11 Eiaha ia toaruaru i te ohipa; ia mahanahana te aau, i te taviniara i te Fatu ra: 12 e oaoa i te tiairaa; e faaoromai i te pohe; tamau u'ana maite ā i te pure. 13 E horoa 'tu i te tao'a i te feia mo'a i to ratou ra ati; e titau ā i te hamani maitai i te taata êc ra. 14 Ei faaora 'tu i te feia i hamani ino mai ia outou; e faaora 'tu, eiaha e tuhi. 15 E oaoa atoa i te feia e oaoa ra, e oto atoa hoi i te feia e oto ra. 16 Ia hoê aau to te tahi e te tahi, eiaha e titau i te mea teitei, e faaau atoa 'tu rā i te feia haehaa. Eiaha hoi ia paari i to outou ihora mana'ora. 17 Eiaha roa te ino e tahoohia i te ino i te taata atoa nei. E haamana'o na i te mea maitai i te aro o te taata atoa nei. 18 Peneia'e o te tia ra, e parahi hau noa outou i roto i te taata atoa nei. 19 E au mau here e, eiaha outou e tahoo, tuu noa 'tu rā i te riri; ua papaihia hoê e. Te parau maira Iehova, Ei ia'u te riri, na'u ia e tahoo atu. 20 E teie nei, te poia ra to enemi, faaamu atu ia'na; e te poihā ra, faaunu atu ia'na; e te haapue ra hoi oe i te auahi arahu i nia iho i

tana upoo i reira. 21 Eiaha ia pohe i te ino, ia pohe rā te ino ia oe i te maitai.

*E auraro te taata atoa i te feia mana i faa-
toroahia ra e tia 'i.*

13 IA auraro maite te taata atoa i te feia mana toroa ra. Aore roa hoi e mana maori rā no ō mai i te Atua ra; te feia mana e vai nei, ua haapaohia ia e te Atua. 2 E teie nei, o tei mārō atu i te toroa ra, ua mārō ia i tei haapaohia e te Atua ra: e te feia e mārō ra, e noaa ia te faahapa ia ratou iho. 3 E ere hoi te feia haava i te mātā'uraa no te feia rarau maitatai, no te feia parau iino rā. Eita anei hoi oe e mātā'u i taua toroa ra? a rave na i te parau maitai, e e haamaitaihia oe i reira. 4 E tavini hoi oia no te Atua ia maitai oe. I rave rā oe i te parau iino ra, a mātā'u; aore hoi oia i mau faufaa oro noa i te 'e'e; e tavini hoi oia no te Atua, ei tahoo e ei tuu i te pohe i te taata i rave i te ino ra. 5 No reira i parauhia 'i e, ia auraro outou e tia 'i; e ere hoi no te pohe ana'e ra, no te aau atoa hoi. 6 No reira hoi outou i horoa 'tu ai i te tao'a aufau nei; e tavini hoi ratou no te Atua, i te rave-tamau-maite-raa i taua mea nei. 7 E teie nei, e tuu atu i te mea e au i te taata atoa ra, e tao'a aufauhia ta'na ra, e aufau atu ā ia; e telo ta'na ra, ei telo ia; o tei mātā'uhia ra, e mātā'u atu ā ia; o tei faateiteihia ra, e faateitei atu ā ia.

8 Eiaha outou ei amutarahu na te taata atoa, area ia aroha 'tu te tahi i te tahi: o tei aroha 'tu hoi ia vetahi e ra, ua haapao ia i te ture. 9 O teie hoi e, Eiaha oe e faaturi, Eiaha oe e taparahi noa i te taata, Eiaha oe e eia, Eiaha oe ei ite haavare, Eiaha oe e nounou, e te vai nei te tahi ture, ua hope atoa ia i roto i teie nei parau e, E aroha 'tu oe i to taata-tupu mai to aroha ia oe iho na. 10 E ore roa te aroha e hamani ino i te taata-tupu: te au ra maori te aroha i te ture.

11 E na reira hoi latou, no te mea ua ite tatou e ua tue roa i te hora araraa to tatou taoto: ua fatata hoi to tatou ora i teie nei, i to tatou faarooara ra. 12 Ua potu roa te rui, ua fatata roa te ao: e teie nei, e haapae atu tatou i te mau ohipa o te pouri, e ahu tatou i te ahu o te ao. 13 Ei haere nehenche to tatou mai te haere ao ra, eiaha ma te hori ra, e te faataero ra, eiaha te parau faufau, e te taiata ra, eiaha te mārō e te feii ra. 14 E tuu rā outou i ta te Fatu ra ta Iesu Mesia i nia iho ia outou, e eiaha e faaitoito i ta te tino, ia tupu to te tino hinaaro.

E farii maitai ā i te feia aore i itoitō rea i te faaroo e tia 'i.

14 TE taata hoi aore i itoitō i te faaroo nei, e farii atu outou eiaha rā e māro i te parau aore i itea-papu-hia ra. 2 Te mana'o ra hoi te tahi e tia ia'na ia amu i te mau maa atoa nei, e o te tahi hoi o tei ore i itoitō ra, o te maa faapupu ana'e rā ta'na e amu. 3 Eiaha tei amu ra e vahavaha 'tu i tei ore i amu ra; e eiaha atoa hoi tei ore i amu ra e faahapa 'tu i tei amu ra; ua fariihia hoi oia e te Atua. 4 O vai hoi oe na a faahapa 'i i to vetahi ē ra tavini? tei to'na ra fatu to'na mau e to'na hi'a: e haamauhia rā oia, e e tia hoi i te Atua ia haamau ia'na. 5 Te mana'o nei te tahi, e huru ē to te tahi mahana i te tahi; te mana'o nei hoi te tahi, *hoē ā huru* to te mau mahana atoa; ia papu rā te taata atoa i to'na ihora aau. 6 O tēi haapao i te hoē mahana ra, no te Fatu ia i haapao ai; e o tei ore e haapao i te mahana ra, no te Fatu ia i ore i haapao ai. O tei amu ra, no te Fatu ia i amu ai, ua haamaitai hoi oia i te Atua; e o tei ore i amu ra, no te Fatu ia i ore i amu ai, e ua haamaitai hoi i te Atua. 7 Aore roa hoi te hoē o tatou e ora nei ei *faatupu* i ta'na iho, e aore roa e taata e pohe nei ei *faatupu* i ta'na iho. 8 Te ora nei tatou, i ora ia tatou ei *faatupu* i ta te Fatu; e te pohe nei tatou, i pohe ia tatou ei *faatupu* i ta te Fatu; e teie nei, te ora nei tatou, e te pohe nei hoi, no te Fatu ā tatou. 9 No reira hoi te Mesia i pohe ai, e i tia faahou ai i nia, e e tia hoi oia i te hāraa, ia riro oia ei Fatu no tei pohe e no tei ora hoi. 10 Eaha rā hoi oe i faahapa 'i i to taeae? e eaha hoi oe i vahavaha 'tu ai i to taeae? e tia atoa hoi tatou i mua i te haavaraa a te Mesia ra. 11 Ua papaihia hoi e, Te na ō maira Iehova, Te ora nei au, e hope te mau tūhi atoa i te tuu i raro i mua ia'u, e hope te mau vaha atoa i te fa'i i te parau i te Atua ra. 12 E teie nei, e hope roa tatou atoa i te fa'i i te parau ia'na iho i te Atua ra.

13 E teie nei, atira na tatou i te faahapa ia tatou iho; teie rā ta outou e haapao, e eiaha ei turoriraa i tuuhia mai i mua i te hoē taeae, e te mea e maheaitu ai. 14 Ua ite au, e ua faaitohia vau e te Fatu ra e Iesu, e aita roa e mea viivii mau iho; o te taata rā i mana'o e, e mea viivii taua mea ra, e mea viivii ā ia ia'na. 15 Ia inoino rā to taeae i ta oe na maa, nita 'tura to oe haerea e au i te aroha. Eiaha ia paruparu te taata i pohe ai te Mesia ra i ta oe na maa. 16 Eiaha hoi to outou maitai ia faainohia. 17 E ere hoi te basileia o te Atua ra i te amu e te inu,

o te parau-tia rā, e te hau, e te oacāraa i te Varua Maitai ra. 18 O tei haapao hoi i teie nei mau parau i to'na tavini-raa i te Mesia ra, te au ra ia oia i te Atua, e e faatiahia e te taata atoa nei. 19 E teie nei, e titau tatou i te parau hau, e te parau e maitai apipiti ai ra. 20 Eiaha e faaorehia te ohipa a te Atua nei i te maa. E mea viivii ore hoi te mau mea atoa nei; e mea ino rā i te taata i amu ma te turori. 21 E mea maitai hoi ia ore ia amu i te puua, e ia ore ia inu i te uaina, e ia ore ia rave i te mau mea atoa e turori ai to taeae ra, e e maheaitu ai, e e paruparu ai hoi. 22 E faaroo to oe? e tapea maita na no oe iho i mua i te aro o te Atua. E no to te taata aore i faahapa ia'na iho i ta'na ra mea tia. 23 O tei faahuru ē rā i te maa nei, ua faahapahia oia ia amu ra, no te mea e ere ia'na i te amu faaroo: o te mau mea atoa hoi e ere i to te faaroo ra, e hara ia.

Ia au maita te mau taeas ratou ratou iho e maitai ai.

15 E TEIE nei, o tatou o tei itoitō nei, e faaoromai i te paruparu o te itoitō ore e tia 'i, eiaha e faatia i ta tatou iho. 2 E haamauruuru tatou atoa nei ia vetahi ē, ia maitai oia, ia itoitō. 3 Aore atoa hoi te Mesia i haamauruuru ia'na iho, i tei papaihia ra e, Te faaino a te feia i faaino ia oe ra, ua iri mai ia i nia iho ia'u. 4 Te mau parau atoa hoi i papaihia i mutaa ihora, i papaihia ia ia ite tatou; ia noaa to tatou tiairaa, i te faaoromai e te mahānāhana o te parau i papaihia ra. 5 E teie nei, ia faafaito mai te Atua no'na te faaoromai e te mahānāhana i to outou aau, outou outou iho, ia au i te hinaaro o te Mesia ra o Iesu. 6 Ia haamaitai outou i te Atua, i te Metua o to tatou Fatu ra o Iesu Mesia, ma te aau hoē, e te vaha hoē. 7 E teie nei, e farii outou ia outou iho mai te Mesia i farii mai ia tatou nei ra, ia maitai te Atua.

8 Teie ta'u parau, e diakono Iesu Mesia no te peritome ia itea te parau mau a te Atua, e ia tupu te parau i parauhia mai i te feia tupuna ra. 9 E ia haamaitai te Etene i te Atua i to'na ra aroha; oia hoi tei papaihia ra e, No reira vau e haamaitai ai ia oe i ō te Etene, e e himene hoi i to oe ra i'oa. 10 E te na ō ra hoi, E oaca outou, e te Etene e, e to'na atoa fa taata. 11 E te na ō faahou ra hoi, E haamaitai outou ia Iehova, e te mau fenua atoa ra, e o outou hoi e te taata atoa ra, ia rahi te haamaitai ia'na. 12 Te na ō maira hoi Isaia, E itea mai te hoē huai no Iese, e te tupu ei arii no te Etene, ei ia'na e tiaturi ai te Etene. 13 Ia faaihia mai outou i te oaca e te hau i te faarooa e

te Atua, e noaa 'i te tiaturiraa, ia rahi to outou tiaturi i te mana o te Varua Maitai ra.

14 O vau iho hoi tei ite ia outou, e au mau taee, e ua i atoa outou i te maitai, e ua faahia outou i te ite, e e tia ia haapii ia outou iho. 15 Ua papai noa 'tu ra vau i te parau ia outou ma te ma-ta'u ore, e te mau taee, ia tupu to outou mana'o otahi, no te maitai i ho-roahia mai e te Atua ia'u nei ra. 16 Ia riro vau ei tavini no Iesu Mesia i te Etene, i te tuuraa 'tu i te evanelia o te Atua, ia tiahia te perosephora Etene, i haamo'ahia e te Varua Maitai. 17 E teie nei, e caoaraa to'u ia Iesu Mesia ra, i te mau mea o te Atua ra. 18 Eita ra vau e tia ia parau i te mau mea atoa ore i ravehia e te Mesia ia'u nei, i te nau mea ra ta'na i rave, i te faahaapaoraa i te Etene, i te parau e te ohipa, 19 ma te semeio rahi e te tapao, i te mana o te Varua o te Atua; e ua parau hua hoi au i te evanelia o te Mesia na Ierusalem 'tu i te haati haerea e tae roa a'enei i Iliriko. 20 Oia ia, i titau maite na hoi au ia parau vau i te evanelia, i te mau vahie aore i ite i te i'oa o te Mesia ra, oi patu noa hoi au i nia i ta vetahi e ra niu. 21 Mai tei papahia ra ra, Te feia aore i taee e te parau no'na ra, e hi'o ratou: e te feia aore a i faaroo ra, e ite ia ratou. 22 No reira hoi au i maoro ai, i ore au i tae atu ai ia outou na. 23 I teie nei ra, aita a'u e vahie toe i teie nei mau fenua, e no te hinaaro rahi to'u e rave rahi a'enei te matahiti i te haere atu ia outou na; 24 ia haere ra vau i Hisepania ra, e haere atu ai au ia outou na, te hinaaro nei au ia ite au ia outou i taua tere no'u ra, e ia arataihia vau e outou i to'u haerea i reira, ia maururu a'e na ra vau i te amuiraa ia outou na. 25 Te haere nei ra vau i Ierusalem e turu atu i te feia mo'a ra. 26 Ua auaui hoi to Makedonia e to Ahaia i te moni no to ratou hinaaro, na te feia mo'a taata rii i Ierusalem ra. 27 Ua hinaaro a hoi ratou, e e amutarahi a hoi ratou na ratou. Ua rave atoa hoi te Etene i ta ratou tao'a no te varua ra, e hopoi atu hoi ratou i ta te tino ra na ratou e tia 'i. 28 E teie nei, ia oti ia'u taua ohipe nei, e ia tuu-mau-hia 'tu e au teie nei maitai ia ratou ra, na o na 'tu vau ia outou na i te haere, a haere tia 'tu ai i Hisepania. 29 Ua ite mau hoi au, e ia haere atu vau ia outou na, e haere atu ia vau ma te i atoa i te maitai o te evanelia o te Mesia ra.

30 E a'o atura vau ia outou, e au mau taee, i te Fatu ra ia Iesu Mesia, e te aroha o te Varua ra, e faaitoito tatou atoa i te pure i te Atua ia'u; 31 ia ora vau i te feia faaroo ore i Iudea ra, e ta'u e rave nei na to Ierusalem ra, ia farii-

-maitai-hia mai e te feia mo'a ra; 32 ia tae atu vau ia outou na ma te oaoa i te tia a te Atua ra, ia anaanaea tatou atoa nei. 33 E teie nei, ei ia outou atoa na te Atua hau. Amene.

Te hapono nei Paulo i to'na aroha i te mau taee i Roma ra.

16 TE tuu atu nei au i to tatou tuahine ia, Phebe ia outou na ma te haamaitai, e diakono no te ekalesia i Kenehera ra. 2 Ia farii mai outou ia'na i te Fatu nei, i tei au i te feia mo'a ra, e tauturu mai hoi outou ia'na i te mau mea atoa e au ia'na ra; i tauturu na hoi oia i te taata e rave rahi, e ia'u atoa hoi. 3 E aroha 'tu ia Perisila raua o Akuila, e pue hoa rave ohipa no'u i te Mesia nei ia Iesu: 4 o tei tuu atoa i to raua a'i i raro ia ora vau: te haamaitai nei au ia raua, e ere ra o vau ana'e ra, o te mau ekalesia Etene atoa ra. 5 E aroha atoa 'tu i te ekalesia i roto i to raua ra fare. E aroha 'tu i tau here ra ia Epeneto, o te hoturua matamua ia o te Mesia i Ahaia ra. 6 E aroha 'tu ia Maria, e ohipa rahi ta'na i rave ia matou nei. 7 E aroha 'tu ia Anederoniko, e ia Iunia, i na taee no'u e pue hoa no'u i taepa-atua-hia matou, e pue taata itea i te mau apusetolo ra, tei roto na hoi raua i te Mesia, hou a'e nei au. 8 E aroha 'tu i tau here i te Fatu nei ia Amepelia. 9 E aroha 'tu ia Urobano, i to matou hoa rave ohipa i te partua a te Mesia nei, e i tau here hoi ia Setaku ra. 10 E aroha 'tu ia Apele, e taata faatiahia ia i te Mesia nei. E aroha 'tu hoi i to te fetii o Arisetobulu ra. 11 E aroha 'tu i tau taee ia Herodiona, E aroha 'tu i to te fetii o Narekisu, i roto i te Fatu ra. 12 E aroha 'tu ia Teruphaina, e ia Terophosa, o tei rave i te ohipa a te Fatu nei. E aroha 'tu ia Peresi herehia ra, o tei rave papu i te ohipa a te Fatu nei. 13 E aroha 'tu ia Rupho i maitihia i roto i te Fatu nei, e i tana metua vahine atoa e to'u ra metua vahine. 14 E aroha 'tu ia Asunekerito, ia Phelegona, ia Herema, ia Pateroba, ia Hereme e te mau taee atoa i o ratou ra. 15 E aroha 'tu ia Philologo, e ia Iulia, e ia Nerea hoi, e i tana tuahine, e ia Olumepa, e te feia mo'a atoa i o ratou ra. 16 E aroha hoi outou ia outou iho ma te ho'i mo'a ra. Te aroha 'tu nei te mau ekalesia o te Mesia ia outou.

17 E teie nei, e a'o atu vau ia outou, e au mau taee, e hi'o maitai iho na outou i te feia i faataa e, e te faatupu i te mea e rurori ai ra, e te au ore i te parau i haapihia e outou na, e farii e atu outou ia ratou. 18 E ere hoi te reira i te tavini no to tatou Fatu no Iesu Mesia, no to ratou ilho opu ra;

e ua haavare i te aau o te feia paari ore ra, i te parau paia e te taparu. 19 Ua parare hoi to outou faaroo i te taata atoa ra, i onca 'i hoi au ia outou; te hinaaro nei râ vau, ia paari outou i te maitai, e ia ma'u au outou i te ino. 20 E teie nei, na te Atua hau e haaparuparu ia Satani i raro a'e i to outou avae eita e mahia. Ei ia outou te ite mau o to tatou Fatu o Iesu Mesia. Amene. 21 O tau hoa rave ohipa nei o Timoteo, e tau mau taeac nei o Lukio, e o Iasona, e o Sosipatera, te aroha 'tu nei ia ia outou. 22 O vau nei hoi o Teretio o tei papai ntu i teie nei episetole, te aroha 'tu nei au ia outou i te Fatu nei. 23 Te aroha 'tu nei Gaio e faaamu ia'u nei e te oka-

lesia atoa ia outou. Te aroha nei hoi te taaou o te oire o Eraseto fa outou, e te tahi taeac nei hoi o Kuareto. 24 Ei ia outou atoa na te aroha mau o te Fatu ra o Iesu Mesia. Amene. 25 E teie nei, ei ia'na i tei tia ia faaitoito mai ia outou, i tei au i te evanelia na'u nei, e i te parau ia Iesu Mesia, ia au i te hebeuraa mai i te parau aro i hunahia i te mau ui atoa mai talitio mai, 26 ua faaitohia mai râ i teie nei, e no te faaue a te Atua pohe ore ra, i faaitohia 'i i te Etene atoa, i te parau a te mau peropheta i papaihia ra, *ia noaa ia ratou* te haapao faaroo ra: 27 ei te Atua paari ana'e ra te haamaitai, ia Iesu Mesia nei, e eiala ia mure. Amene.

TE EPISETOLE MATAMUA A TE APOSETOLO RA

A PAULO

I TO KORINETIA RA.

To Paulo aroharaa 'tu i te ekalesia i Korinetia ra.

1 O PAULO, i haapaohia e te hinaaro o te Atua ei aposetolo na Iesu Mesia, o to tatou taeac nei o Sositene, 2 i te ekalesia o te Atua i Korinetia na, tei haamo'ahia i roto i te Mesia ra ia Iesu, i haapaohia ei feia mo'a, e te feia atoa e tau atu i te i'oa o to tatou Fatu ra o Iesu Mesia i te mau vahii atoa ra, to ratou e to tatou atoa hoi: 3 ei ia outou te aroha mau e te hau, no ô mai i te Atua i to tatou Metua ra, e no ô hoi i te Fatu ra ia Iesu Mesia.

4 Te haamaitai nei au i tau Atua ia outou aita e faaen, i te maitai a to Atua i horoahia mai e te Mesia ra e Iesu ia outou na; 5 ua rahi hoi ta outou ia'na i te mau mea atoa nei i te mau parau atoa e te ite: 6 e ua faaite-papu-hia te parau o te Mesia i roto ia outou na. 7 E aita a'enei outou i mairi i muri i te mau maitai atoa nei, i te tiaira i to tatou Fatu ia Iesu Mesia i te faraa mai: 8 na'na e haapapu ia outou e tae noa 'tu i te hopea, eiala ei faainoraa, i te mahana o to tatou Fatu o Iesu Mesia ra. 9 E parau mau ta te Atua, i haapaohia 'i outou no te amuiraa a ta'na Tamaiti a to tatou Fatu a Iesu Mesia ra.

10 E teie nei, e au mau taeac, te a'o ntu nei au ia outou i te i'oa o to tatou Fatu ra o Iesu Mesia, e ei parau hoê ta outou atoa na, e eiala ia amahamaha i

roto ia outou: ia ati maite râ outou ma te aau hoê e te mana'o hoê. 11 Ua faaitohia mai au ia outou, e au mau taeac, e to te fetii o Heloe e, e mârôraa tei roto ia outou. 12 Teie ta'u parau, te parau ana'e na outou e, No Paulo vau; e no Apolo vau; e no Kepha vau; e no te Mesia vau. 13 Ua amahamaha anei te Mesia? e o Paulo anei tei faasataurohia no outou? e i bapetizohia anei outou i roto i te i'oa o Paulo? 14 Te haamaitai nei au i te Atua i te mea aore au i bapetizo i te hoê o outou na, maori râ o Kerisepo e o Gaio; 15 o te parau te tahi taata e, na bapetizo vau ia'na i roto i to'u nei i'oa. 16 E ua bapetizo atoa vau i te fetii o Setephano; aita 'tu a'u taata i ite i te bapetizoraa vau.

17 Aore hoi te Mesia i tonono ia'u o bapetizo, e parau haere râ i te evanelia; eiala râ ma te paari parau, o te riro hoi te satauro e te Mesia ra ei mea faufaa ore. 18 O te parau hoi i te satauro nei, e parau maamaa ia i te feia e pohe; area ia tatou ia faaorahia nei, o te mana ia o te Atua. 19 Ua papaihia hoi e, E faa'ore au i te paari o te feia paari, e e faariro vau i te ite o te feia i ite ra ei mea faufaa ore. 20 Teihea te taata paari? teihea te papai parau? teihea te taata mârô i te parau o teie nei ao? e ere anei ua faariro te Atua i te paari o teie nei ao ei maamaa? 21 Aore a'era to te ao i ite i te Atua i to'na iho paari, i te ravea paari a te Atua ra, hinaaro a'era te Atua i te faaora i te feia